

## Entrevista exclusivo cu Fiscal Mayor Karen Janssen, riba caso di Natalee Holloway

ORANJESTAD(AAN): Ayera DIARIO a haya oportunidad di tene un entrevista cu Fiscal Karen Janssen, kende ta encarga cu investigacion di e caso Holloway y desde ayera ta vocero tambe pa e caso aki.

DIARIO a puntra sra Janssen con ta bayendo cu e caso, unda cu el a bisa cu apesar cu e investigacion ta tumando hopi tempo, e ta haya cu esaki ta bayendo bon, caminda e ta hopi satisfecho cu trabao di cuerpo policial.

Segun Janssen e enfoca na e momentonan aki ta menos riba interrogacion di e sospechosonan, pasobra nan a conta nan storia caba y mas riba tur cos rond di e caso, por ehempel unda nan tabata, cu kendenan nan a papia y cu si nan tabata tin contacto cu otro despues cu nan a worde laga den libertad e prome biaha.

E Fiscal a splica tambe di con a laga e sospechosonan den libertad den prome instancia.

El a bisa cu ora cu un persona bira sospechoso den un caso, ta insensato pa detene mes ora, pa motibo cu bo lo tin masha tiki pa basa bo investigacion riba dje.

Ta mihor pa acumula informacion, pa ora cu bo haci e detencion, bo tin material pa usa durante interrogacion y pa confronta e persona cu cualkier contradiccion di su banda.

Pa e motibo aki segun Janssen a scoge pa e caminda cu nan a scoge.

Segun Janssen mester tin cierto indicacion relevante, pa detene un persona como sospechoso y den e caso di Paul van der Sloot Fiscal a sinti cu esaki ta e caso, pues a



detene Paul van der Sloot y a interoge, sinembargo despues Huez Comisario a sinti cu no tabata tin suficiente echo y circunstancia, pa sigui tene y pesey nan a lague bay.

Segun e Fiscal esaki no ta nifica cu lo no sigui investiga van der Sloot.

Ora cu tin mester, lo haci pregunta na van der Sloot, relaciona cu aspectonan di e caso.

Fiscal Janssen a bisa tambe cu e ta convenci, cu tur pregunta den e caso lo worde contesta pronto.

Pa locual ta e tres hobennan, Huez Comisario a haya cu tabata tin suficiente motibo pa prolonga nan detencion y lo evalua si esaki lo worde prolonga un biaha mas.

Ministerio Publico ta trahando duro pa acumula suficiente prueba pa por haya sa e berdad den e caso aki, pa asina por persigui esnan responsable, si acaso algun crimen a worde cometi.

Esaki segun Janssen kende a splica cu ainda tin varios tip cu dreña y cu nan ta investiga tur.

El a bisa tambe cu e ta tene e famia na al tanto di con e investigacion ta bayendo, pa asina nan tin e feeling cu nan

por confia cu tur cos posibel ta worde haci, pa yega na e berdad.

Segun e Fiscal ta hopi importante tambe pa Aruba, pa nos resolve e caso aki, pa asina mundialmente tur hende por ta convenci, cu e trabao cu tin di haber cu husticia, ta worde haci debidamente y corectamente. DIARIO a puntra si e sospechosonan a menciona lugarnan unda posiblemente un curpa por worde haya y cu pa e motibo aki, cuerpo Policial tabata busca na e sitionan aki.

Janssen a contesta cu no lo ta bon pa duna comentario riba esaki, mirando cu e investigacion ta andando. Sinembargo el a splica cu poco poco e imagen di loke a sosode e anochi en cuestion, ta birando mas cla.

El a compara e caso cu un puzzel, cu falta ainda algun pida, pa e ta completo.

A puntra Janssen su reaccion riba loke prensa internacional ta pasa den nan programanan, unda cu el a splica cu bastante informacion ta worde mal interpreta pa prensa internacional.

Pa e motibo aki, ta sali diferente comunicado den diferente lenguahe, pa duna bon splicacion cada bez, riba diferente aspecto di e caso.

Janssen a splica cu un di e ehempelnan di mal informacion ta e echo cu prensa Mericano a bisa erroneamente cu un persona por worde teni pa 116 dia sin algun cargo contra di dje.

Esaki no ta berdad segun Fiscal mayor Karen Janssen.